

HITZ BITAN

ERRESUMA BATUA

Arma nuklearrak erabiltzeko prest dago Londresko gobernuak, Defentsa ministroaren arabera

Erresuma Batuko Gobernuak Iraken eta beste «estatu gaiztoen» aurka arma nuklearrak erabiltzeko prest dagoela eman zuen aditzera atzo Geoff Hoon Defentsa ministroak. «Masa suntsiketarako armak» erabiliz Erresuma Batuko tropen aurka eginez gero arma atomikoekin erantzungo dutela esan zien ministroak Londresko Legebiltzarreko kideei. «Saddam Husseinek erakutsi du iraganean arma kimikoak erabiltzeko go-goa», gaineratu zuen Hoonek.

GIBRALTAR

Londresen eta Madrilak subiranotasuna banatzeko plana aurkeztuko dute aurki

Hurrengo hilabeteotan Erresuma Batuk eta Espainiak Gibraltarren gaineko subiranotasuna banatzeko egitasmoa aurkeztuko die Londresen gibraltardarrei. Astelehenean 25.000 herritar inguru kalera atera ziren, Gibraltarren estatua aldatzeko saioaren aurka. Egitasmoa aurkeztu ondoren baliteke gibraltardarrei bozatzeko aukera ematea, Londresen arabera.

ANGOLA

UNITAko buruak atxilotu dituzte, negoziatzera behartzeko

Gobernuaren kontra borrokan aritu den UNITA Angolaren Independentzia Osorako Batasun Nazionala gerrillako buruzagiak negoziatzera behartzeko atxilotu dituztela adierazi zuen atzo taldeak Erroman duen eledun batek. Atxilotuen artean Paulo Lukamba UNITAko idazkari nagusi eta Alcides Sakala atzerri gaietako bozeramailea daude.

FRANTZIA

Chiracek hauteskundeak galduz gero hura epaitzeko bidea ireki du Parisko auzitegi batek

Frantziako presidente Jacques Chiracek eginiko luxuzko hainbat bidaia herritarren diruarekin ordaindu ote ziren ikerterako saioa bertan behera ez uztea ebatzi zuen atzo Parisko auzitegi batek. Erabakiari jarraiki, litekeena da egun presidente izateagatik immunitatea duen Chirac galdekatzera deitzea, datorren hilean egitekoak diren hauteskundeak galdu eta karguak ematen dizkion pribilegioak kenduz gero. Parisko alkate zenean eginiko bidaiengatik ikertzen ari dira Chirac.



STR / AP
Morgan Tsvangirai, Zimbaweko oposizioko burua.

ZIMBAWE

Traizioa leporatu eta bermea jarrita askatu dute Tsvangirai oposizioko buruzagia

Morgan Tsvangirai Zimbaweko oposizioko burua bermea ordainduta libre utzi zuten atzo, Harareko auzitegi batek traizioa leporatuta apirilaren 30ean epaituko dutela jakinarazi ondoren. Iruzur salaketa ozenen erdian duela 10 egun eginiko hauteskundeetan irabazle atera zen Robert Mugabe presidentearen hilketa planeatu izana leporatu diote Tsvangirairi. Hauteskunde bezperan oposizioko buruaren ordezkia atxilotu zuten. Oposizioak «jazarpena» salatu du.



ROBERT NICKELSBURG, / EPA

Anakonda operazioan AEBetako soldaduek larunbatean hildako bi talibanen gorpuak agertu ziren atzo.

AFGANISTAN. AEBek operazioa arrakastatsutzat jo arren, istiluak ez dira eten

‘Anakonda’ operazioa bukatu eta biharamunean eraso jo dute Al Kaedak eta talibanek

Erredakzioa | DONOSTIA

AEBek antolatutako *Anakonda* operazioak ez du estatubatuarrek espero zuten bukaera izan. Al Kaeda sarearen eta talibanen indarren aurka egiteko plana bukatutzat jo eta hurrengo egunean, AEBen eta haien aliatuen tropei eraso zieten Al Kaedako kideek eta talibanek, Pakistango mugatik gertu.

Erasoa herenegun gauean gertatu zen, Khost hiritik hurbil, Baghram aireportu militarren inguruan, Afganistan ekialdean. Indar aliatuen bozeramaile Bryan Hilfertyk jakinarazi zuenez, Al Kaedako kideek eta talibanek granada jaurtitzailerekin, suzko armekin eta morteroekin eraso zieten. Baghramgo aireportua da AEBek Afganistanen duten operazio baserik garrantzitsuenak, eta *Anakonda* operazioaren gune den Paktya eskualdetik gertu dago.

«Erasoei erantzun genien, eta erantzuten segitzen dugu hau kontatzen dudana bitartean», adierazi zuen Hilfertyk herenegun gauean.

Pakistanen egoitza duen Afghan Islamic Press agentziak jakinarazi zuenez, erasotzaileek hiru afganistandar aliatu hil eta zortzi zauritu zituzten. Haatik, beste iturri batzuek ez zuten datuok baieztatzerik izan.

Bestalde, AEBetako soldadu talde bat zauritu zen herene-

gun, haiek zihoazen MH-53 helikopteroa gaizki lurreratu zenean. Istripua zergatik gertatu zen argitu ez bada ere, AEBetako komando nagusiak adierazi zuen ez zela inongo erasoren ondorio izan.

‘Anakonda’ operazioari arrakastatsu iritzi diote AEBek

AEBetako Armadako iturriek jakinarazi dutenez, *Anakonda* operazioak iraun duen 17 egunetan Al Kaedako eta talibanen indarretako 500 bat gerrillari hil dituzte AEBek eta afganistandarren koalizioako aliatuek. Paktya eskualdeko harpe eta tunel sareak izan dira aliatuen jomuga. AEBetako iturri horien arabera, *Anakonda* operazioa arrakastatsua izan da.

Gisa berean, iturriok ukatu zuten Al Kaedako eta talibanen inguruko gerrillari askok Pakis-

tango muga gaindituz ihes egin zutela. AEBetako aliatu afganistandarrek, ordea, esan zuten gerrillari batzuek Pakistanera alde egin zutela.

Halarik ere, AEBetako iturri militarrek aitortu zuten soldadu estatubatuarrek eta kanadarrek egindako bilaketan 20 gerrillari ingururen gorpuak soilik jaso zituztela.

Afganistango errege ohia asteartean da itzultzekoa

Afganistango erregetzatik kendu zuten Mohamed Zahir Shak atzo Erroman adierazi zuen datorren asteartean Kabulera joango dela. Hala, ia 30 urtez erbestean izan ondoren, etxera itzuli ahal izango da Zahir Sha.

Hasieran, 87 urteko errege ohia gaur zen iristekoa, Nouruz edo Afganistango Urte Berria ospatzeko, baina, azkenean, bidaia atzeratzea erabaki zuen. Dena den, litekeena da Zahir Sharen itzulera egun batzuk atzeratzea, segurtasun neurriak direla eta.



EUSKO JAURLARITZA
GOBIERNO VASCO

Kultura Sailak diruz lagundutako egunkaria